

仙谿林大宗祠族譜

由福建省圖書館復印一九九零

仙谿林大宗祠族譜

序

林氏源流序

林氏之先。出自黃帝高辛之後。黃帝乃有熊國君少典之子。姓公孫。名軒轅。母曰附寶。視大電繞北斗樞星而孕。二十五月而生帝於帝丘。長於姬水。有聖德。受國於有羅氏。納四姬。生二十五子。得四者十有二人。一曰雲相。雲相生玄囂。玄囂生蟠極。蟠極生帝嚳。爲高辛氏。娶有綏氏女。名簡狄。夜祀于高禴。浴于玄丘之水。見玄鳥墮卵。取而吞之。遂孕而生契。及長賢。而舜登用之。進於堯爲司徒。佐禹治水。教民有功。乃封國於商。賜姓子氏。契生昭明。昭明生相土。相土生昌若。昌若生曹圉。曹圉生冥。冥生振。振生微。微生報丁。報丁生報乙。報乙生報丙。報丙生報壬。報壬生主癸。主癸生天乙。諡曰成湯。伐夏得天位爲殷。國傳太丁。太甲。沃丁。太庚。小甲。雍己。大戊。仲丁。外壬。河亶甲。祖乙。祖辛。沃甲。祖丁。南庚。陽甲。盤庚。小辛。小乙。武丁。祖庚。祖甲。庚辛。庚丁。武乙。太丁。帝乙而生

帝辛爲商紂。暴虐無道。殺害民生。比干紂諸父。帝乙庶弟也。有賢行。佐紂爲孤卿。見紂無道。微子去。箕子囚。累諫不聽。乃歎曰。主過不諫。非忠也。畏死不言。非勇也。卽諫而不從且死。忠之至也。乃奉面而進諫。不去者三日。紂問何以自持。比干曰。善行仁義。所以自持。紂怒曰。吾聞聖人心有七竅。信有諸。遂殺比干。剖視其心。焚其面。下令曰。宗少師說妖言惑衆。故誅之。又剖比干次妃胎面觀之。時正妃夫人陳氏。甫孕三月。恐禍及。卽將侍婢四人。奔于牧之野。避紂之難于長林石室之中而生男。名堅。字長恩。至周武王伐紂天下平定。夫人乃將男堅歸。周武王以居長林而生。遂因林而命氏。賜姓爲林氏。以其殷湯之後。先王之胄。且能遠害避紂之難以不絕其世。其智足以任政。拜堅爲大夫。食邑博陵。受封爵焉。夫人受姓。各有所因。或因生而得姓。或因官而命氏。有功則有官。族邑亦如之。是其義也。如黃帝生於姬水姓姬。堯長伊耆姓伊。舜誕姚墟姓姚。此並因生而得姓。因官若司馬司徒之類是也。官族者。若孟孫叔孫之徒。食邑而姓。取地而姓者。各因其封。若管蔡宋楚齊魏韓梁是也。故受姓氏者。實有所自。堅以後居博陵。子孫遂成閥閱。歷周秦及

漢。玉鈕金繩。枝黨繁興。榮蔭當世。戰國以來。遇秦始皇焚書坑儒。譜第散落。後漢之末。遭董卓遷都長安。墳籍失去。卓言林氏門宗。強於河北。漢主受卓譖。收宗家七百四十四人。同時流竄。昭穆失序。降於三方。鼎立綱紊。天下凡爲三國。生民惟習武功。莫知文藝。爰自晉氏失馭。五馬渡江。衣冠避於南地。並以枝分葉散。前後記牒。爲所闕漏。自非建盛節。立奇功。可以著美一時。垂名千載。鮮有不墜者矣。以故大族皇帝之苗。世家諸侯之胤。忠臣孝子。文德武功。各擅蘭芳。俱傳梓馥。著司馬遷之史記。傳述殊名。見編目之繁文。君臣異式。莫不代序相承。昭穆不紊。及觀受姓得封之因。源委可究。桑梓卜居。丘陵兆域。或時遷而南渡。遇世亂而北移。或受爵而移西。或因居而東徙。雖復三江殊流。會出岷山。九河塹分。終歸滄海。綴集條貫。舉宏綱目。派系雖別於九州。星羅還同於五緯。上自博陵受封。下乃貴賤無隱。具題緘封名曰宗譜。惟夫命代奇績。舊在茂陵之書。冠世高勳。先紀丘明之史。各隨事實。欲其信傳。庶幾來代哲人。尙有所考云。

唐貞觀六年四月朔中書令西河公并州溫彥博撰

林氏譜系序

昔商王子比干。遭紂不道。累責直言。剖心而死。夫人陳氏。娠方三月。逃于長林石室中。生男泉。周武王伐紂。封比干墓。召其夫人。賜所生子姓林名堅。以其林中石上所產也。封清河郡。今貝州也。次拜大夫封博陵郡公。食邑二千戶。其後林放問禮之本。在七十二子之列。左傳有林雍。林楚。林不狴。莊子有林回。棄千金之璧。晉有林伯昇。與釋道安爲友。漢有太子太傅林遵。吳有將軍林恂。齊有皇后林氏。趙有宰相林皋。生九子。國人稱之曰九德之父。十德之門。繼後二十六代至禮公。居於徐州下邳縣生子二。穎顯。穎生二子懋祿。祿公仕晉。永嘉喪亂。元帝南巡。祿公扈從。公初爲征南將軍。次遷爲合浦郡太守。考滿。却任晉安溫陵二郡。又勅守溫陵而終。卽閩泉州也。後追封晉安郡王。子孫相繼。遂居于閩。按史記漢武帝時。越王餘善叛。詔樓船將軍楊僕。韓安國。共圍閩人。閩人恐懼。殺餘善。送首降。武帝以閩越數叛。命遷其民於江淮。久空其地。今諸姓入閩。自永嘉始也。

唐貞元六年庚午九月望後三日比干公二百一十四代孫

邵州刺史蘊序

晉安林氏世系序

林氏始自子姓黃帝裔。及殷王子比干。以直諫死。夫人以遺腹子。生于長林石室中。周武王克商。乃封比干墓。賜其姓曰林。食采博陵。世爲大夫。墜下生載。襲封博陵。爲冀州牧。是爲西河祖也。于後回棄千金璧。保其赤子。放從孔子學。問禮大本。在春秋則雍楚不狃。著名史記。在秦則齊郡鄒邑。子姓續繁。西漢以齊郡分置濟南。而尊爲其大夫。林之望于濟南者。尊實始之。西晉時。下邳最爲名郡。而禮居其中。林之望于下邳者。禮實先之。東晉元帝南渡。祿爲招遠將軍。遷合浦太守。還卽遷晉安溫陵令。因家焉。則林之望于晉安者。又祿首之也。蓋自漢武誅東越。閩越數叛。徙其民于江淮。其地遂虛。至晉永嘉。中州板蕩。衣冠入閩者八族。所謂林黃陳鄭詹邱何胡。實居江側。遂名晉安。今福唐。侯官。閩縣。長樂。連江。溫陵。南安。同安。清溪。德化。漳州。龍溪。漳浦。惠安。莆田。長城。南管。澄清。壺公。上桃。

仙游 芹林 大觀洋 鰲溪 游洋。卽祿之苗裔也。祿下生景。景生緩。皆封南平侯。七世生茂。茂生孝寶。爲泉州刺史。三世生玄泰。漳州刺史。玄泰生萬寵。饒陽太守。其子散居北螺村。號爲東北二林。萬寵生三子。長韜。次披。三昌。韜生尊。尊生欒。孝感動天。白鳥甘露三降。唐德宗詔賜雙闕。旌表門閭。號爲闕下林。披生九子。各官刺史。號爲九牧林氏。九牧藻公七世孫茂宗。遷于仙游石碑。師道文章。深爲一時所器。七世生濟孫。讀于芹林別墅。狀元及第。推爲當世準繩。夫自賜姓之始。及于渡江之餘。故冢喬木。奕世甘棠。無時或曠。林氏之族。豈非冠于中州也哉。蓋自罵賊之節于剖心。有光神助之文于問禮。有合烏露青蛇之異。一棄璧之仁。朱紫聯芳之祥。適食采之恩。然則問禮者。道學之源也。食采者。衣冠之會也。剖心之忠。昭於日月。棄璧之誠。著於乾坤。準今推昔。國而忠維造化。家而孝表鄉閭。簪纓濟美。有不繩繩祖武者哉。出處與時偕。書香有鼎鼐。此林之家事也。傳家無所寶。惟有孝與忠。則林之家法焉。謹錄以爲訓。

明至正元年臘月吉日九牧江陵十四代孫襄謹書

林氏族譜跋

族譜者。譜林氏之族也。昔之譜牒。嘗存於秘閣。自唐侍郎蘊。從國師溫彥博處。得其副本。因而流傳至今。蓋誠閭閻之寶也。然林之子孫。寶其衣冠。余之觀覽。寶其行實。於闕下之甘露也。寶其孝。於西川之罵賊也。寶其忠。無鬼之論。可以破千古之疑。還珠之賦。可以鳴國家之盛。而梨嶺之詩。又寶其可徵世德之殷。驗人材之多矣。然族譜之寶。天下之至寶也。族譜之觀。天下之奇觀也。以奇觀而得至寶。余深有冀也。遂跋之于譜後。

宋端明殿學士蔡襄謹書

宋仁宗皇帝御題譜詩

嘉祐六年。侍御史臣林悅

原名英
避廟諱

乞歸祭掃祖墳。仁宗問曰。卿名家殷太師苗裔。家乘

可得見乎。悅取次以進。閱數日。御筆大書忠孝二字于譜首。鉗以御寶。又賜詩二章。敕曰。珍重到家。可卽回京。

長祿派出下邳先。移人閩邦遠更延。忠孝有聲天地老。古今無數子孫賢。故家喬木蟠根大。深谷猗蘭奕葉鮮。上下相承同紀載。百千年後萬千年。莆郡卿家名望族。三仁而下爵王公。存孤實抗回天義。報國常據貫日忠。德潤丰姿人有異。光增譜牒世無同。古今紀載難窮盡。一代強如一代隆。

殷太師忠烈公墓考

殷太師比干公墓在汲郡。今河南衛輝府城北七十五里。周武王封其墓。有銅盤銘。孔子有書殷比干墓（墓字下半體缺）四字。

唐開元四年。游子武之奇於僊師。耕耘卜築。獲一片銅盤。形方四尺六寸。上有鏤文。文深二寸。其文十六字。初獲銅龜若豆金。命工淬之。有古文字。不成言句。重鑿其所得處。乃見斯銘。其前崗後道。與泉並存。惟林木無矣。考覈圖籍。乃比干墓銘之後五步。其文曰。左赫右泉。前崗後道。萬世之年。茲焉是寶。

殷少師忠烈公像贊

唐翰林學士李 白撰

靡軀匪仁。蹈難匪智。至於其死。然後爲義。忠無二軀。烈有餘氣。正直聰明。至今猛視。咨爾末代。爲臣不易。

清高宗純皇帝御製過比干墓詩乾隆庚午年

天地之經。君臣之義。貴戚異姓。同歸一致。與社稷共。逝將焉避。孰了其難。孰丁其易。嗟哉斯人。遭殷之季。罔爲臣僕。先王獻自。披瀝以陳。甘於殞棄。五畝佳城。千秋弗墜。夫子適周。載經柏隧。早許三仁。詎惟四字。

元魏孝文帝太和十八年南巡。次殷比干墓。祭以太牢。

唐太宗貞觀十年贈太師。諡忠烈。

元仁宗出居懷州。大德十一年春正月。庚寅。至衛輝。經比干墓。顧左右曰。紂內荒於色。毒虐四海。比干諫。紂剗其心。遂失天下。命祠比干於墓。爲後世勸。

仁宗延祐三年二月。敕衛輝守臣修比干墓。歲時致祭。元衛輝路總管陳祐。修比干墓。且請於朝。著爲祀典。

順帝元統六年。加封比干爲仁顯忠烈公。

周封博陵公堅公像贊

裔孫吏部尙書大鼎拜撰

緊維太師。負節抱奇。遭時之難。知殷之衰。剖心不痛。甘死如飴。仁必有後。篤生佳兒。有石若簇。有水如斯。林木蒼鬱。山岳歲難。實鍾名哲。藩屏周基。食毛賜姓。百祿是宜。億萬昌熾。玉樹繁禧。

宋封長山侯放公像贊

宋理宗紹定二年御製贊

禮之有本。子能啓問。大哉斯言。光昭明訓。德輝泰山。謬祭能奮。崇茲祀典。盍永令聞。

晉封晉安郡王祿公像贊

裔孫吏部尙書大鼎拜撰

粵惟吾祖。晉室勳良。經綸廟社。黃門侍郎。清討禍亂。敕封郡王。名垂天壤。功在巖廊。孫枝裒發。億萬彌昌。華組如帶。積笏盈床。願瞻祖德。萬世有光。

晉南平侯景公像贊

唐尙書右僕射許國公高士廉撰

慘哉殘賊。剖心剝胎。仁必有後。天忍絕哉。忠誠貫日。氣節如雷。篤生國輔。爲時雄才。襲封茅土。世用爲材。萬年珠樹。大木徂徠。回瞻離黍。於焉可哀。

晉南平侯綏公像贊

尚書右僕射許國公高士廉撰

天生豪傑。黼黻皇猷。經綸廟屋。間值琅璆。驅馳王祚。挺立名流。晉秩常侍。翼勅藩侯。爲時補袞。爲士羔裘。太師華裔。弓冶作求。

晉郎中令格公像贊

世孫主客郎中冲之拜撰

郎位列星。秩貴惟令。江左匡時。大統是正。企瞻禮容。寬和持敬。德婉五常。桂枝多慶。

宋建陽令靖之公像贊

裔孫太子詹事披拜撰

桓桓我公。爲國屏翰。經文緯武。雄戰登壇。旣平外難。愈厪內安。良牧暫借。製錦烹鮮。丹山碧水。挂笏以看。

晉南海令遂之公像贊

世孫工部侍郎光朝拜撰

學精曲臺。三禮任職。簿領劇煩。鴻才卓識。海甸鳴琴。渚翔鸛鶴。甘棠遺愛。粵都思德。祥毓八龍。荀氏是式。灼灼德星。光映南國。

宋給事中遯民公像贊

世孫主客郎中冲之拜撰

日上朝謁。昌言盡職。白簡含霜。青蒲映日。衲中彈文。奏對詳悉。帝曰汝能。爲予良弼。不競不綵。惠此四國。

齊補功曹玉珍公像贊

秘書省正字徐寅撰

黃門七子。北斗萃祥。公居其少。位應搖光。金昆玉季。鵠原雁行。官雖羣幕。政擬循良。儼儼袍笏。儀肅而莊。抱德淵厚。洵美且臧。

梁建安令元次公像贊

御史中丞建陽江文蔚撰

黃華白鶴。煩劇岩城。揮絃以理。案牘風清。溫恭其度。冲澹其情。名聞奕世。疊笏彰纓。

隋右丞茂公像贊

七世孫殿中侍御史 藻拜撰

晉安十世。載德祇躬。大隋啓宇。遵簡臣工。職寵右丞。佐命鴻功。峨冠擗笏。正色宏衷。北螺遷祖。實肇於公。

隋刺史孝寶公像贊

崇文館校書郎黃 璞撰

秀鍾壺嶠。北螺挺特。國子鴻儀。蜚聲初職。錦製鉅都。河洛載德。剖竹清源。枌榆傲則。蓋右丞入蕭之篤生。惟肇啓于小心之翼翼。

隋侍御史文濟公像贊

宋資政殿學士龔茂良撰

太微法曜。如日常炳。簪筆烏臺。伏蒲騎省。糾繆繩愆。材猷明敏。特秉節鉞。巡行五嶺。緯武經文。爲國之屏。

隋常侍參軍國都公像贊

裔孫廣東儋州同知 名佚照原譜錄

東閩勝地。幕府稱賢。分曹贊政。偉績翩翩。學成製錦。治美烹鮮。一方砥柱。風采高騫。勳猷遠著。視彼先。原譜先上少一字。

唐刺史玄泰公像贊

裔孫吏部尚書大鼎拜撰

德音炯炯。萃映閩南。清時器重。彈慶華簪。謝家寶樹。荀氏多男。制科策對。名登第三。賈生切直。杜牧。慙。校書天祿。刺史出驂。絲綸白鳳。經緯黃。卓哉令聞。百世能譚。內空白二字。照原譜錄。

唐高平太守萬寵公像贊

崇文館校書郎黃璞撰

爲詹事父。爲九牧祖。擢開元。清秩圭組。兩郡分符。仁風載溥。鹿轂行春。隨車甘雨。詒厥孫謀。高曾規矩。

竊按我族代有名賢。其名贊傳序。散著於家乘史冊者。汗牛充棟。修不勝修。以上祇就白塔章甫家藏祖父飛山訓導。手抄閩林世譜首卷。各于像下附記贊詞錄之。漏萬之譏。知所不免。惟茲所修祭祠公簿。義取簡明。與世譜之貴詳悉者異。欲觀全豹。俟後之重修世譜者。廣爲搜集焉可。

中華民國二十三年仲冬

殿頭裔孫弁謹識

晉安郡王祿公墓記

晉安郡王公墓。在惠安縣塗嶺官路旁。陳同關附近。坐乾向巽。穴名龍馬毓奇。墓頂岩石古篆。有林始祖諱祿公九龍穴墓。明器尙存。石將軍二。石羊二。墓上有碑隸。莆始祖晉安郡王祿公墓。係明嘉靖乙酉。裔孫太子太保刑部尙書俊。命男吏部郎中達書。知惠安縣新建萬變立。天啓丁卯。裔孫惠安教諭齊聖。偕惠安舉人徵龍等。重立龍馬毓奇碑于道左。鐫莆林始祖晉安郡王祿公墓道。知惠安縣事安福鄧英書。

閩林及第題名

閩林向後及第者應詣祠登匾
匾式高一尺八寸長三尺四寸

元符三年庚辰科廷試第一甲第三人

通福清

淳熙十一年甲辰科廷試第一甲第二人

琢福清

至元元年乙亥科廷試第一甲第一人

濟孫仙游

至正三年癸未科廷試第一甲第一人

亨仙游

永樂四年丙戌科廷試第一甲第一人

環莆田

永樂十一年壬辰科廷試第一甲第二人

誌閩縣